



PROPOSICIÓN CONXUNTA DE TODOS OS GRUPOS MUNICIPAIS PARA MELLORAR A CALIDADE DE EMPREGO EN SANTIAGO DE COMPOSTELA E FREAR A EMIGRACIÓN XUVENIL

A precariedade laboral existente en Galiza, que provoca falta de estabilidade laboral e vital, está a xerar unha vaga de emigración que afecta, de maneira especial á mocidade. En concreto, na última década están a marchar 20.000 persoas cada ano por falta de oportunidades laborais pese a contar con formación e cualificación profesional especializada.

Santiago precisa fórmulas que incidan na diversificación económica, mediante o fomento da industrialización sustentábel para o impulso socioeconómico da capital do país, que se está a ver gravemente afectada por fiar boa parte da súa economía á estacionalidade que caracteriza o sector turístico e hostaleiro.

De feito, cómpre que as axudas públicas para relanzar comercio e hostalaría vaian ligadas ao mantemento das condicións estipuladas nos convenios laborais co fin de reducir a precariedade e a economía somerxida que aflorou durante a pandemia da covid-19, ao carecer numerosas persoas de contratos de traballo regularizados e ser habitual a práctica de facer horas de traballo sen cotizar.

Tamén as últimas reformas laborais provocaron que se facilitasen a contratación por horas e os despedimentos, reducindo a protección de traballadores e traballadoras, o que segue a xerar e a incrementar a inestabilidade laboral. Isto acrecéntase coa acumulación de horas extras moitas veces sen remunerar que se utilizan á libre disposición de empresarios/as e como un instrumento discrecional da xornada, o que xa constitúe un comportamento estrutural que urxe corrixir.

A nivel do Estado español, o impacto da pandemia da covid-19 tamén repercute de xeito especial entre a xuventude, pois un de cada catro menores de 25 anos perderon o seu emprego ou permanecen en ERTE e o 40% están en situación de desemprego.



Mentres, no rango de maiores de 25 anos, un de cada 10 perdeu o seu emprego ou permanece en ERTE e o 15,5% están en paro.

Entre as consecuencias desta situación laboral, Galiza está entre as nacións europeas onde máis rápido descende a poboación en toda Europa, o que está a causar un grave problema demográfico que pode ser irreversible. Precisamente para apoiar territorios con problemas demográficos, o Fondo Europeo de Desenvolvemento Rexional (FEDER) do período 2021-2027 encamiña axudas que poden ser empregadas para evitar a emigración, apostando por conseguir investimentos destinados a fixar poboación e evitar a expulsión de profesionais.

O informe de 2020 sobre fuga de talento do Comité das Rexións Europeo indicou que a fenda entre o sistema educativo e o mercado de traballo é unha das causas da emigración de profesionais e, neste sentido, insta a que sexan as autoridades subestatais, en cooperación coas estatais e europeas, as que tiren rendibilidade do investimento en capital humano dun país, que se perde coa fuxida de talento. Isto, sen dúbida, é un problema en Galiza, posto que é moi grave que se forme o alumnado en centros de ensino e nas universidades galegas sen que ese talento e profesionalidade permanezan no país.

Así, os fondos de cohesión europeos pódense empregar neste sentido, pois se trata dun problema humano, económico e demográfico, porque na súa maioría marchan persoas mozas que son as que posúen a maior capacidade reprodutiva sen que o Goberno galego actúe de xeito decidido para evitalo.

Segundo datos do IGE, 326.824 persoas marcharon de Galiza a outras comunidades españolas e ao estranxeiro no período 2009-2019, das que 37.205 tiñan entre 16 e 24 anos. Isto acontece por mor da falta de oportunidades laborais no noso país cando buscaban optar a un traballo que lles permitise conseguir a emancipación económica. Segundo datos da OCDE, a perda media de fuga de talento é do 10% en Galiza, cando a media europea é do 3%; consecuencia directa dos desequilibrios sociais e económicos existentes no noso país, unha porcentaxe agravada nos anos de Goberno de Feijóo.



Santiago de Compostela ten unha poboación de 97.848 habitantes inscritos/as no padrón, á que lle hai que sumar a emigración a outras comunidades españolas e as 13.180 que residen actualmente no estranxeiro, das que 6.844 son mulleres e 6.336 son homes, segundo o Informe “A emigración en cifras” da Xunta de Galiza. Con data de marzo de 2021 están rexistradas en Santiago de Compostela 6.133 persoas como demandantes de emprego, 3.334 mulleres (54%) e 2.799 homes (46%). A isto hai que engadir persoas desempregadas, especialmente as de longa duración, que xa non están inscritas ao esgotar as prestacións.

Na actualidade, hai 523.672 persoas galegas emigradas no estranxeiro que recolle o rexistro de 2020, das que 268.941 son mulleres e 254.731 son homes. A iso hai que incrementarlle a emigración a outras comunidades española, que é de 335.262, 179.757 mulleres e 155.505 homes.

Un instrumento que pode utilizar o Concello para corrixir esta marcha laboral de mocidade pode ser Uninova (Sociedade para a Promoción de Iniciativas Empresariais Innovadoras, S.L.), impulsada polo propio Concello e a Universidade de Santiago de Compostela (USC), que ofrece asesoramento, aceleración e soporte á creación de iniciativas empresariais fortemente innovadoras. Uninova xestiona o Edificio Emprendia, con máis de 3.000 m² de espazos de incubación para empresas innovadoras e un ecosistema completo de apoio ao emprendemento. En particular, a Sociedade inclúe entre as súas posíbeis actividades a de contribuír e colaborar na reciclaxe, actualización e especialización profesional de persoas posgraduadas, cara asúa integración nunha organización empresarial.

A Xunta de Goberno Local aprobou o 09/02/2021 o expediente de crédito extraordinario co número 2021-CREXT-01 por un monto global de 57.198 euros co obxectivo de dar cobertura de crédito adecuado e suficiente para atender a adquisición do 31% do capital social da empresa Uninova. No Pleno extraordinario de 12 de febreiro aprobouse este incremento de capital en UNINOVA, para a posta en marcha do Polo de Innovación en Biotecnoloxía da Sionlla. Así, o Concello pasou a ter do 49% ao 80% da sociedade co obxectivo de favorecer a reindustrialización empresarial, a promoción do asentamento de empresas e a captación de proxectos de investimento nos sectores biotecnolóxico e da madeira no parque empresarial, para facer de Santiago e Galiza un referente no sector.



Tamén está anunciada a creación dunha estrutura comercial que posibilite a atracción de investidores e empresas biotecnolóxicas, que exerza de portelo único para a promoción, prospección e acompañamento de novos proxectos empresarias.

Por todo o anterior, os grupos municipais do Concello de Santiago de Compostela presentan á consideración do Pleno o seguinte **ACORDO**:

1. O Concello, en colaboración coa USC e Uninova, promoverá a contratación de persoas mozas de Santiago de Compostela no Polo de Innovación en Biotecnoloxía da Sionlla.
2. O Concello convocará o Consello municipal da mocidade para buscar alternativas que impulsen a creación de emprego e a estabilidade laboral, de cara a frear a emigración xuvenil. Ao abeiro deste foro, trazarase un Plan de Emprego para a mocidade.
3. O Concello de Santiago incluírá na convocatoria de axudas públicas aos sectores da hostalería e comercio a obriga de presentar unha declaración responsable do cumprimento de todas as disposicións legais, regulamentarias e convencionais vixentes en materia laboral, seguridade social, seguridade e saúde no traballo, e igualdade entre mulleres e homes.
4. O Concello facilitará a organización das mobilizacións do Primeiro de Maio que se organicen en Santiago de Compostela.
5. O Concello instará ó Goberno do Estado a solicitar axudas do FEDER destinadas a paliar o problema demográfico de Galicia (e de Santiago en particular) para conseguir investimentos destinados a fixar poboación e evitar a expulsión de profesionais.



Santiago de Compostela, 28 de abril de 2021.

*Gumersindo Guinarte Cabada
Varela*

Voceiro do grupo municipal do PSdeG-PSOE
PP

Alejandro Sánchez-Brunete

Voceiro do grupo municipal do

Marta Lois González

Voceira do grupo municipal de CA
BNG

Goretti Sanmartín Rei

Voceira do grupo municipal do